

চাঁদ সম্পর্কে যে তথ্যগুলো কেউ কোনদিন শোনেনি

♦ জিয়া খলিফা

চাঁদ সম্পর্কে আপনারা অনেক তথ্য শুনে থাকলেও এমন কিছু তথ্য আছে যা কোনদিন শোনেনি! এসব তথ্য সাধারণ মানুষদের থেকে শোনা যায় না। তাই দেরি না করে এখনই সব তথ্য জেনে নিন।

* চাঁদ অবিবাহিত। কারণ চাঁদ মামা থাকলেও চাঁদ মামি নেই।

* চাঁদ মামার নাম ব্যবহার করে বৃহত্তর চট্টগ্রাম বিভাগে চান্দের গাড়ি নামক যে যানটি চলে, তার সাথে চাঁদের কোনো সম্পর্ক নেই।

* কবিদের কাছে চাঁদের ভিন্নতা রয়েছে। কারও কাছে চাঁদ প্রেমিকার সমান হলেও, কারও কারও কাছে চাঁদ আসলে বলসানো রুটি।

* সবাই মনে করে চাঁদের একটি অন্ধকার দিক আছে। মূলত চাঁদের ওইদিকটায় সবসময় লোডশেডিং চলে। হ্যাঁ, শুধু বাংলাদেশে না, চাঁদেও লোডশেডিং হয়।

* চাঁদের চেহারা আমরা যে দাগ বা গর্তগুলো দেখি এগুলো আসলে ব্রণের দাগ। রাত জেগে ফোন টেপার ফলে এইগুলো জন্ম নিয়েছে।

* চাঁদ শুধু আকাশের দিকে তাকালে দেখা যায় না। মাঝে মাঝে মহাল্লার বিভিন্ন বাসার ছাদেও দেখা যায়।

* চাঁদ আলোকিত মানুষ হতে নিয়মিত বাংলাদেশের পাঠ্য বই পড়ে। কারণ চাঁদের নিজস্ব কোনো আলো নেই।

কৌতুক

* কীভাবে বুঝব?

ভদ্রলোক: এই যে, তুমি যে ভিক্ষা চাইতাহো, আমি কীভাবে বুঝব যে তুমি চোখে দেখো না? ভিক্ষুক: ওই যে দূরে একটা গরু ঘাস খাইতাহো আপনি দেখতাহেন?

ভদ্রলোক জবাবে বললেন, হ্যাঁ।

ভিক্ষুক বলল, ওইটা আমি দেখতছি না।

* ভালো তো?

ক্রেতা : আরে ভাই, এটা কী তালি দিয়েছেন, সারা দুনিয়ার চাবি ঢুকালেই খুলে যায়! এমনকি সেফটিপিন ঢুকালেও খোলে!

বিক্রেতা : তাহলে ভাই এই তালিটা নেন, আর সমস্যা হবে না।

ক্রেতা : এটা ভালো তো?

বিক্রেতা : ভালো মানে? এই তালি একবার মারলে এটার নিজের চাবি দিয়াও খোলা যায় না!

* টয়লেটটা অনেক ভালো

ছেলে : মা, আমাদের টয়লেটটা অনেক ভালো। দরজা খুললে লাইট জ্বলে, দরজা বন্ধ করলে লাইট অফ হয়।

মা : ওরে বদের হাড়ি, তুই আজও ফ্রিজে প্রস্রাব করেছিস!

* বিজ্ঞাপন

এক লোক একটি পত্রিকা অফিসে গেছে তাঁর চাচার মৃত্যুসংবাদে বিজ্ঞাপন দিতে।

‘আচ্ছা ভাই, এ বিজ্ঞাপনটি ছাপতে টাকা কী পরিমাণ খরচা হবে, একটু বলবেন?’

‘আমাদের পত্রিকায় বিজ্ঞাপনের হার হচ্ছে, প্রতি কলাম এক সেন্টিমিটার জায়গার জন্য ৩৬০০ টাকা।’

‘বলেন কি! এই বিজ্ঞাপন ছাপাতে গিয়ে আমিই তো মরে যাব দেখছি।’

‘কেন? কী হয়েছে আপনার?’

‘আরে ভাই, প্রতি কলাম এক সেন্টিমিটার জায়গার মূল্য ৩৬০০ টাকা। কিন্তু আমার চাচা তো ১৮২ সেন্টিমিটার লম্বা। তাহলে বুঝুন আমার অবস্থাটা!’

* গাধা বিক্রি

এক লোক গাধা বিক্রি করবে।

পত্রিকায় বিজ্ঞাপন দিতে গিয়ে ভাবলেন, একেবারে সাদামাটা ভাষায় না লিখে একটু কাব্যিক ভাষায় লেখা যাক!

অতঃপর লিখলেন, ‘কারও যদি গাধা প্রয়োজন হয়, আমাকে স্মরণ করুন।’

* চিঠি

এক লোক তার বন্ধুকে চিঠি লিখেছে।

প্রিয় রফিক,

বহুদিন পর তোমাকে লিখছি। আস্তে আস্তে লিখছি, কারণ আমি জানি তুমি দ্রুত পড়তে পারো না...

* ইন্টারভিউ

এক লোক ইন্টারভিউ দিতে গেছে—

‘একটা মোটর কীভাবে চলে, বলতে পারেন?’

‘ঘররররররর...!’

‘হয়েছে, এবার থামুন!’

‘ঘররর...ধুপ...ধুপ...ধুপ।’

যে ৭ উপায়ে লোডশেডিং সমস্যার সমাধান করা যায়

♦ উইলিয়াম শেক্সস পীর

লোডশেডিং জনজীবনে মারাত্মক বীপর্ষয় এনে দিয়েছে। সমস্যার মোকাবেলা করতে হচ্ছে লক্ষাধিক মানুষকে। সবার এই দুঃখের কথা চিন্তা করে বাজারে নিয়ে আসা হয়েছে এ থেকে বাঁচার কিছু অভিনব পদ্ধতি। আসুন দেখে নিই কী।

* উচ্চপদস্থ সরকারি লোক ধরে ধরে বিশেষ সফরে বিদেশে পাঠাতে হবে। টিম বানিয়ে ইউরোপ-আমেরিকার কোন দেশে পিকনিকের ব্যবস্থা করে পাঠানো গেলে সমস্যা দ্রুত সমাধান হবে।

* সরকারি কেনাকাটায় খরচ আগের চেয়ে কয়েকগুণ বাড়াতে হবে।

* বিদেশে টাকা পাচারকারীরা যেন নির্বিঘ্নে, নিশ্চিন্তে আরও বেশি বেশি করে বিদেশে টাকা পাচার করতে পারে সে দিকে খেয়াল করলেই কিন্তু লোডশেডিং আর থাকে না।

* ঘুষের টাকাও যদি কিপটামির সাথে দেয়া নেয়া হয় তাহলে এই দেশে লোডশেডিং হবে না তো কোন দেশে হবে? ঘুষের টাকার পরিমাণ বাড়াতে হবে,

মন খুলে ঘুষ দিতে হবে।

* লোডশেডিং সিকিউরিটি অ্যান্ড নামক একটা আইন জারি করতে হবে অবশ্যই। এই আইনের কাজ হবে, যে বা যারাই লোডশেডিং নিয়ে কথাবার্তা বলছে তাদের ধরে ধরে নিয়ে যাওয়া। ফলে দেশে লোডশেডিং নিয়ে কোন আলোচনাও থাকবে না। আলোচনা নেই মানে বলা যাবে, লোডশেডিংও নেই।

* কুমড়া কিংবা বাদামের তেলের মত অতি দ্রুত কারেন্টেরও কিছু বিকল্প খুঁজে বের করা দরকার। জোনাকি পোকা কিংবা পাছায় কারেন্টওয়ালা মানুষদেরকে বিদ্যুতের বিকল্প হিসেবে দাঁড় করাতে পারলে সমস্যার সমাধান হয়ে যাবে।

* প্রাইভেট কোম্পানিগুলোর সাথে কুইক কুপি বাতি রেন্টাল বা কুইক হারিক্যান রেন্টাল প্রজেক্ট চালু করা যেতে পারে। একবার কুইক কুপি বাতি মার্কেট পেয়ে গেলে জনগন ভুলেই যাবে আগে তারা বিদ্যুতের আলো দিয়ে চলতো।

একদা লোডশেডিংয়ে রবীন্দ্রনাথ ও নজরুল

♦ কাজী রবীন্দ্রস্টাইন

রবীন্দ্রনাথ আর কাজী নজরুল নামে দুই কবি একই পাড়ায় থাকেন। আজ সকাল ৯টা থেকে পাড়ায় কারেন্ট নেই। কম্পলেইন অবশ্য করেছেন কবিগুরু, কিন্তু কোন লাভ হয়নি।

আড়াইটা বেজে গেছে, কারেন্টের কোন খোঁজ নেই। কবিগুরুর ইচ্ছে করছে কারেন্টের লোককে নিয়ে কঠোর কিছু লিখবেন। কিন্তু তাহলে আবার অনেকে ভাববে তিনি নজরুলকে কপি করছেন। তাছাড়া কারেন্টের বিষয়গুলো হ্যান্ডেল করে এক ব্রিটিশ কোম্পানি। কদিন পর নোবেল নিতে যাবেন, এখন এরকম ভায়োলেন্ট হওয়াটা ঠিক হবে না।

তার চেয়ে নজরুলকে বলতে হবে কিছু লিখতে, ভায়োলেন্ট হওয়াটা ওর হবি। একটু ফ্রি টাইম পেলেই ভায়োলেন্ট হয়ে যায়। কবিগুরুর তখনি মেসেঞ্জারে নজরুলকে নক দিলেন

‘কারেন্টের লোকটা ভীষণ পাজি,

ওকে নিয়ে দু লাইন লিখো তো কাজী?’

রাত ৯টা, প্রতিবাদ করতে গিয়ে কাজী নজরুলের বীণায় আবার অগ্নি লেগেছে। অগ্নি নিভাতে গিয়ে সারা শরীর ঘেমেটেমে একেবারে অস্থির। ফ্যানের

সুইচ টিপতে গিয়েই দেখা গেল কারেন্ট নেই।

নিজের অজান্তেই নজরুল একটা পোড়া পোড়া গন্ধ পেল। বুঝতে পারল গরমে সে গিল হয়ে যাচ্ছে। ফুল গিল হয়ে যাওয়ার আগেই রবি ঠাকুরকে রিপ্লাই দিতে হবে।

ডাটা অন করতেই টুইং করে শব্দ হল, রিপ্লাই পেতে দেরি হওয়ায় রবি ঠাকুর ইতোমধ্যে আবার মেসেজ দিয়েছে,

‘রিপ্লাই দাও মোরে রিপ্লাই দাও।’

সাথে সাথে নজরুল রিপ্লাই দিলেন-

‘আমি বিদ্রোহী রণক্লান্ত,

কেবল কারেন্ট আসলেই হব শান্ত,

কে আছিস? কারেন্টের লোককে

এক্ষুনি ধরে আন তো!’

রবীন্দ্রনাথের ফোন ততক্ষণ চার্জ শেষ হয়ে বন্ধ হয়ে যাওয়ায় মেসেজটা তিনি আর দেখতে পারেননি। তিনি তখন উঠানে বসে কবিতা লিখছেন-

‘এই নিশি ক্ষণে মোর স্মার্টফোনে,

তিল চার্জ আর নাহি রে,

ওগো আজ আমি থাকবো ঘরের বাহিরে...’